

Ioane keba peba titi ower a ie kimibiria urubia aboto

*Keremiro kimio dubu nou sosoro
a-gorowapotai-ro*

¹ Keba ia tau ato keremiro ower a ta-gowamo, iedi keremiro ower a ro urubia dubu e, ina nou sapuwo to nimowauti nio umoro oi ri. Nedi ower a ro Iesu e. Mo borubi kitiodorai urubia mutu nimo ro simara gare to ta-nemewidiro-rimo, simara idomari to ta-nowea-rimo, ibose simara tu to ta-nowaseidiro-rimo.

² Keremiro kimio dubu nou sosoro nato gorowapotai-ro paea dubu to gararapoi. Nedi keremiro ro nou aboudo gorowapotai-ro nimo ro ta-nowea-rimo, ina abora urubia nou sapuwo to nimowauti-dumo. Iedi keremiro kimio dubu ro keba se Abera mutu gomidiro-rido, ina nimo aboto nou ro gorowapotai-ro.

³ Mo borubi kitiodorai urubia mutu nimo ro beda tanaro niauri-rimo ibose na-nirowidiro-rimo, abora nio mo ro nou nimowapotai mabu nimo ubi ie nio mutu mea mino to atu se karadabu korowarebai. Ibose nimo mea mino to niradabutiti-dumo Abera Godi nou mere Iesu Keriso mutu.

⁴ Nou mabu rido nisioidiro nedi ower a ro nimo atu se auna ia kamade ro iwati rie.

Godi imese meana ia ie

⁵ Iesu aboudo ower a ia ta-nirowai-rimo ina abora nio mo ro a-nimowauti ibo Godi nou auna

ia woroworo ie, nou abato ata duwoduwo ata owamo pua.

⁶ Nimo ro karo ato idaibo owera, 'Nimo mea mino to niradabutiti-dumo Abera Godi mutu,' ina duwoduwo maumo ato koroho ato, nimo karasaubuti urubia ie, nimo morobise gabo ato orowotoi pua.

⁷ Nimo woroworo ato korowomidiro ato Godi nou beda sosoro woroworo ato imidiroiti, nimo atu se mea mino to karadabu e ina korowarebai ie. Ibose nimo woroworo ato korowomidiro ato, nou mere Iesu Keriso edi karima ro nouto nimo ubauba sirio kimatopeamuti ie.

⁸ Nimo ro karo ato idaibo owera, 'Nimo abato ubauba ata iamo pua, nimo imese meana ia ie,' nimo nakara se narasaubuti-dumo ina iedi morobise owera ro nimo abato iamo pua.

⁹ Kaupoti nimo ro simara ubauba kiwapotaidiro ato, Godi umoro ie nimo ubauba sirio kimatopeamuti Iesu Keriso edi karima ro neito, mabu nou mea tuputupu tanaro dubu e, nou keba se beda owera garo nou ro aise kisioidiro ie.

¹⁰ Nimo ro karo ato idaibo owera, 'Nimo ubauba kisioidiro pua,' ina ibo ie Godi nimo ro karasaubuti dubu to nasorotiti-dumo, ina nou edi owera ro nimo niro turi ato iamo pua.

2

Modobo ie nimo ubauba tato korowomidiro

¹ Merebusere nirimagare babio, modobo ie ubauba tanaro kisioidiro tato korowomidiro ina nedi owera ro nou mabu ato nisioidiro nio aboto. Kaupoti nimo ro kisioidiro ato ubauba

tanaro Iesu Keriso nou tuputupu dubu e, nou ro karo ie owera Abera aboto nimo sapuwo to ubauba kimatopeamuti aboto.

² Mabu nou simara keremiro gaiwai nimo sapuwo to, Abera serawo neito adibiai ri ina miro edea rie. Ibo pua nimo ubauba nakara se kimatopeamuti, ibose imese sirio urubia nedi duriomoro ro nato na-orowomidiro neio mutu e.

³ Nimo ro Godi owera kibodoro ato nimo umoro koi ie ibo Godi nimo mutu e.

⁴ Etio ro karo ra ibo, 'Godi nimo umoro ie,' kaupoti nou owera kibodoro tato io neio karasaubuti urubia ie, ina nou edi morobise owera ro neio niro turi ato iamo pua.

⁵⁻⁶ Kaupoti etio ro ibodoro-dumo Abera owera nou edio nirimagare ro momuo se neio abato modobo ato kiamo ie. Nimo ro karo ato ibo, 'Nimo Iesu mutu noroho-dumo,' modobo ie Iesu beda sosoro goroho nimo ibo koroho. Nimo umoro neido koi ie ibo nimo Iesu mutu e.

Urubia nirimagare aise gi-imati-ri

⁷ Nirimagare babio mo ro orio sabi owera iatiti pua nio aboto, nedi atu owera ro nio ro keba se ta-girorowai-rimo.

⁸ Kaupoti iedi orio sabi owera ro orio na ie, mabu Iesu nou simara durupi to nirimagare ta-gowapotai-ro ina nio abato edi nirimagare ro tiamo, nio ro nou owawuti-dumo. Mabu ubauba tanaro duwoduwo maumo ato na-isioidiro-dumo Iesu edi mea woroworo ro nou ro womu to amadi-osutai-ri.

⁹ Etu ro karo ra ibo, 'Mo Godi edi mea woroworo ro nato nomidiro,' kaupoti nou serawo na-woi arua urubia aboto, iedi dubu ro

Godi edi mea woroworo ro nato omidiro pua,
nou ubauba duwoduwo maumo ato omidiro.

¹⁰ Etu ra kimibiria neama nirimagare
na-emati, nou Godi edi mea woroworo ro nato
omidiro, nou Godi edi mea gabo ro neido
aratateai-ri pua.

¹¹ Kaupoti etu ra serawo na-owamo kimibiria
neama aboto nou idaibo sosoro ie urubia dubu
duwoduwo maumo ato na-waratowouti,
kotoburio moro iauri pua, mabu edi duwoduwo
ro nou nou ro atowouti.

¹² Merebusere nirimagare babio, nedi owera
ro nio aboto nisioidiro mabu nio Iesu ro gabo
na-gimesioidiro nio ubauba Godi ro
ta-gimatopeamuti.

¹³ Abeamio, nio aboto nisioidiro mabu nio
keba se umoro ta-goi-rimo edi dubu ro keba ia
keba ia tau ato na-imidirotiti, nou Iesu e.

Orio urubia, nio aboto nisioidiro mabu nio ro
Satani ta-gowororuwo-rimo.

Merebusere, nio aboto nisioidiro mabu nio
Abera Godi umoro ta-goi-rimo keba se.

¹⁴ Abeamio, nio aboto nisioidiro mabu nio
umoro ie keba ia keba ia tau ato edi dubu ro
na-imidirotiti.

Orio urubia, nio aboto nisioidiro mabu nio
niro turi aramirio-dumo, Godi edi owera ro nio
niro turi ato tiamo, ibose Satani nio ro
ta-gowororuwo-rimo.

¹⁵ Etio abato iamo ubi sopu duriomoro tanaro
kisioidiro aboto io idaibo ie Abera nirimagare
neio ro emati pua. Ubi auna se iamo mamo
duriomoro tanaro kisioidiro aboto,

¹⁶ edi tanaro ro duriomoro urubia ro na-isioidiro-dumo, idaibo ie durupi ubi tanaro kisioidiro, arua urubia nakomu aboto kimaragoidiro, ibose simara namabu sirio sapuwo to keremowabu.

Idaibo sirio tanaro Abera aboudo pua, duriomoro tanaro ie.

¹⁷ Sopa duriomoro simara ubauba ubi tanaro sirio mutu aupise ie womu to korosutai. Kaupoti Godi ubi tanaro etio ro isioidiro-dumo neio ro ama-irowomidiro-titi-ri womu tato womu tato imese tau.

Mea se Iesu nasa rubi toroho-dumo

¹⁸ Merebusere nirimagare babio, womu tau aupise ou-die, nio ro keba se ower a ta-girorowai-rimo ibo Iesu nasa dubu aupise ie amadi-orowapotai-ri, ibose abora Iesu nasa urubia ta-gorowapotai-dioumo, ina noudo ie nimo umoro ta-noi-dumo ibo abora womu tau aupise ou-die.

¹⁹ Nedi nasa urubia ro nimo kimibiria urubia edi soirio ro neio neido gosuwoduti-rimo, neio nimo morobise kimibiria borubi pua. Neio nimo morobise kimibiria borubi rasiri ie neio nimo mutu ba-sorowomidiro. Kaupoti neio ta-gosuwoduti-rimo noti gorowapotai-dioumo neio nimo morobise kimibiria borubi pua.

²⁰ Ina nio sapuwo to, Tarena Urio nio abato tomidiro Iesu ro na-gemeiriai-ro, ina noudo ie nio ro morobise umoro ta-gimade-rimo.

²¹ Etou mabu rido nisioidiro nedi ower a ro nio aboto? Nio ro morobise umoro imade pua, nou ri ra? E e, mabu nio morobise umoro ta-gimade-rimo, ibose nio umoro ta-go-i-rimo ibo

morobise ower a rido ata karasaubuti ower a ata osuruwo-ri pua.

²² Karasaubuti urubia etio ra? Urubia etio ra na-war o-dumo ibo, 'Iesu Godi ro kohodowa dubu pua', idaibo sosoro urubia karasaubuti urubia ie, io neio Iesu nasa urubia ie, Abera mere Iesu atu se neio ro ibeiouti-madumo.

²³ Godi edi mere ro etio ro ebeiouti-dumo, Abera neio mutu omidiro pua. Etio ra paea se na-imowauti-dumo ibo 'Iesu Godi ro Kohodowa Dubu e', Abera neio mutu timidirotiti.

²⁴ Keba se nio ro morobise ower a na-girorowai-rimo nou se ba-miamotiti nio abato. Nedi ower a ro nio abato nama-iamo-ri Iesu nou Abera mutu nio neitiro abato ama-irowomidiro-ri.

²⁵ Iesu ro keba se ta-gutura womu tato womu tato keremiro nimo abato ama-iamotiti-ri.

²⁶ Iedi urubia ro nio na-isaubuti-dumo, mo ro neio sapuwo to nisioidiro nedi ower a ro.

²⁷ Ina nio sapuwo to Tarena Urio nio abato tomidiro Iesu ro na-gemeiriai-ro. Modobo pua ata sosoro kitamudiro dubu nio nou ro kitamudiro aboto, mabu Tarena Urio nio abato tomidiro nio nou ro itamudiro. Tarena Urio karasaubuti pua, morobise ie, nou ro ata ower a ata owopirowa pua, nio nou ro mea ia se itamudiro. Nio Tarena Urio ro beda sosoro to itamudiro, nio Iesu abato se ba-diateidiro-mo.

Godi merebusere etio ra Satani merebusere etio ra

²⁸ Merebusere nirimagare babio, Iesu abato se gi-ateidiro-ri mabu nio idaibo tanaro namadimi-isioidiro-ri, Iesu edi tau ato namadi-owameai-ri nio kamade mutu

ama-orowotoi-ri, siripo ri imatarumawado-ri pua.

²⁹ Nio umoro tiamo ibo Iesu Keriso nou tuputupu dubu e. Ibose nio morobise umoro kiamo modobo ie ibo nio abato etio ra mea tuputupu tanaro na-isioidiro-dumo, neio Godi ro simara merebusere to ta-giapo.

3

¹ Ei! Nio gare neito ma-diedea-rimo! Nimo Abera ro auna ia nirimagare momuo se nimia-ro nimo nou merebusere to kararasoro aboto. Ina nimo nou e nou merebusere ie. Kimibiria tato urubia ro Iesu mea se neio ro eibimai pua, ina noudo ie nimo neio ro ieibimai pua ibo nimo Godi merebusere ie.

² Nirimagare babio abora nimo Godi merebusere to nararasoro-dumo. Nimo beda sosoro nama-orowomidiro-ri umoro mea se iwai pua. Kaupoti nimo umoro tiamo Iesu korowapotai tau nimo nou sosoro anama-orowomidiro-ri. Mabu nou abora beda sosoro omidiro-die nimo ro anamadimo-owea-ri.

³ Ina etio ro imaragoidiro-dumo nedi tanaro namadimo-ororosoidiro-ri, neio modobo ie ubauba aboudo karatateawado Iesu beda sosoro imidirotiti ubauba tato.

⁴ Ubauba tanaro etio ro isioidiro-dumo Godi edi sabi ro neio ro isebo-dumo, mabu ubauba tanaro kisioidiro ato maumo ibo owamo sabi kisebo tanaro ie.

⁵ Ina nio umoro ta-go-ri-rimo Godi ro kohodowa dubu ta-gorowapotai-ro imese urubia ubauba imatopeamuti ri. Iesu ata ubauba tanaro tato dubu e,

⁶ ina nou mabu ato ie urubia etio ra Iesu mutu na-iradabutiti-dumo neio ubauba tanaro kisioidiro pua. Etio ra ubauba tanaro na-isioidiro-dumo neio ata umoro tato ie Iesu.

⁷ Merebusere nirimagare babio, nio amia urubia ro kisaubuti modobo pua erere tanaro sapuwo to, mabu etio ro isioidiro-dumo tuputupu tanaro io tuputupu urubia to neio ro se ararasoro-dumo, Iesu idaibo sosoro tuputupu dubu e.

⁸ Satani ro keba ia tau ato gatamuai womu tato abora nou ro ubauba tanaro noti isioidiro-titi. Etio ro isioidiro-titi-dumo ubauba io neio Satani patu urubia ie. Kaupoti Godi edi mere ro nou ri gorowapotai-ro Satani edi woko sirio ro na-gisioidiro nou ro itotouti rie.

⁹ Godi ro etio iasoro merebusere to neio ubauba inaina kisioidiro pua, mabu Godi ro neio niro turi ato orio keremiro ta-gibouti, ibose neio Godi merebusere to imese nato ta-gararapoi-rimo, ina nedi urubia ro ubauba tanaro isioidiro-ri pua.

¹⁰ Etio ra isioidiro tato tuputupu tanaro io neio Godi merebusere pua, ina ibose etio ra urubia nirimagare imati tato, io neio ibose Godi merebusere pua. Idaibo tanaro nimo ro na-niauri-dumo nimo umoro koi ie ibo Satani merebusere etio ra ina Godi merebusere etio ra.

Modobo ie kimibiria urubia nirimagare keremati

¹¹ Nimo nirimagare keremati modobo ie. Nedi owera ro nio ro keba se nou giowai-rimo.

¹² Keina Satani namutuna ie nou simara neama na-gopia. Nou ro edi tanaro ro na-gosioidiro nio ro nou ematiouti ate! Mabu

boira nou simara neama na-gopia? Mabu nou ro edi tanaro ro na-gisioidiro meana pua, ubauba ia ie, ina neama ro edi tanaro ro na-gisioidiro tuputupu ia ie.

¹³ Ina noudo ie kimibiria borubi nio orowadaudio ate kimibiria tato urubia ro nio namadimi-ihoio-ri.

¹⁴ Nimo umoro ta-noi-rimo ibo nimo asaso pamo maumo ato orowomidiro pua, morobise keremiro maumo ato norowomidiro, mabu kimibiria borubi mutu nirimagare neremati-dumo. Etio ra nirimagare eremati tato neio asaso Godi sosoro gabo ato pamo urubia sosoro irobu, keremiro tato ie.

¹⁵ Etio ro ihoio-dumo urubia neio idaibo ie Godi sosoro gabo ato neio ro urubia iopiauti-dumo, ina nimo umoro tiamo kororopiauti urubia abato womu tato keremiro iamo-ri pua.

¹⁶ Nimo idaibo sosoro nimowapotai-die morobise nirimagare ibo ie, Iesu simara keremiro ta-gaiwai nimo sapuwo to. Ina nimo modobo ie kimibiria borubi sapuwo to simara keremiro kiaiwo.

¹⁷ Kimibiria urubia etio ra namabu sirio mutu na-orowomidiro ina borubi kimibiria urubia mibo mutu na-orowomidiro idomari to se namadimi-iauri-ri, Godi edi nirimagare ro neio abato a-iamo ra? E e. Iamo-ri pua.

¹⁸ Merebusere, nirimagare babio nimo nirimagare owera to se owawuti-ri pua, modobo ie nimo ro nedi nirimagare ro durupi to aise kowawuti.

Kimibiria urubia tere na ie Godi sosoro gabo ato

19 Nimo nirimagare keremati ato arua urubia mutu nimo umoro ie ibo nimo ro morobise gabo nobodoro-dumo. Ina nou mabu ato ie nimo niroturi ato sirio tau miro ro kiamo ie, ata tere kimaragoidiro tato ie Godi sosoro gabo ato.

20 Nimo kimaragoidiro ato ibo, 'Etu umoro ra nimo ro ubauba nisioidiro-dumo,' kaupoti nimo ro isioidiro pua, Godi auna umoro ie nimo nirogoro kimiauri aboto, nimo miro nou ro ina kimowame ie. Erere tau ato imese sirio tanaro na-ororosioioidiro-dumo Godi nou auna umoro ie.

21 Kimibiria namuturubi nirimagare babio, nimo keremasibai ato ibo, 'Nimo ro ubauba isioidiro pua,' nimo abato miro ro kiamo ie, ibose nimo kararatoro ato Godi aboto siripo ri imatarumawado-ri pua nou sosoro gabo ato.

22 Nimo ro nou aboto beda namabu ri kararatoro ra, nou ro nimo kimio ie, mabu nimo ro nou owera ti-nibodoro-dumo ibose nou kamade ti-nowaititi-dumo.

23 Godi ro nimo keba se ta-nimowapotai-ro netewa teibo tanaro teibo kisioidiro-ma aboto. Nimo modobo ie kimibiria kiamo nou mere Iesu Keriso sapuwo to, ina ata nou e nimo nirimagare keremati modobo ie arua kimibiria urubia mutu. Nedi owera ro nou sapuwo to Iesu ro keba se ta-nimowapotai-ro.

24 Etio ro ibodoro-dumo Godi edi owera ro neio Godi mutu orowomidiro, ibose Godi neio mutu tomidiro. Nimo umoro beda sosoro koi ra ibo Godi nimo abato na-omidiro? Mabu nou ro Tarena Urío ta-gemeiriai-ro nimo aboto abora tomidiro nimo abato.

4

*Urubia dubu oweru karo ato mea se
gi-emodobowauti-ri*

¹ Namuturubi nirimagare babio, Godi ipusu oweru urubia to na-waratigi-dumo neio duriomoro gabogabo ta-gororoburutai-rimo, abora neio toroho-dumo. Ina noudo ie urubia ro beda oweru to imowauti-dumo nio ro modobo pua dorogora se kimibiria aboto. Ata dubu ro nio oweru kimowauti ato nou nio ro mea se gi-emodobowauti-ri nou edi oweru to na-warou, Tarena Uriu aboudo ra o karasaubuti orora aboudo ra?

² Ata dubu ro paea se na-imowauti ibo, 'Iesu Keriso nedi duriomoro neito ta-gou-ro, paea dubu to gararapoi,' io nedi oweru ro morobise ie Tarena Uriu aboudo ie. Nio ro umoro neito amadimo-oi-ri ibo nedi oweru ro Tarena Uriu aboudo osuruwo-die.

³ Ina ata dubu ro paea se na-imowauti ibo, 'Iesu Keriso paea dubu to oroho pua nedi duriomoro ro nato,' nedi oweru ro Tarena Uriu aboudo ou pua, Iesu nasa dubu aboudo ie. Nio ro keba se oweru ta-girorowai-rimo ibo Iesu nasa dubu amadi-ou-ri ina abora nedi duriomoro nato toroho.

⁴ Merebusere nirimagare babio, nio Godi urubia ie. Kerematigi urubia nio ro keba se ta-giworuruwo-rimo mabu Tarena Uriu nio abato na-omidiro nou imese auna ia ie, Satani nedi duriomoro ro nato na-woroho nou mutu modobo pua.

⁵ Nedi kerematigi urubia ro neio sopu duriomoro urubia ie, ina noudo ie neio ro edi oweru ro na-imowauti-dumo neio ro duriomoro

kimaragoidiro ower a imowauti-dumo, ina duriomoro urubia ro aise irowidiro-dumo.

⁶ Ina nimo ia sapuwo to nimo Godi urubia ie, urubia etio ra umoro Godi, neio ro nimo ower a tirowidiro-dumo. Nimo ro idaibo sosoro nieibimo-dumo Tarena Urio neio abato tomidiro. Kaupoti Godi umoro tato urubia io neio ro nimo ower a kirowidiro pua. Nimo ro idaibo sosoro nieibimo-dumo Tarena Urio neio abato omidiro pua.

Morobise nirimagare kowawuti

⁷ Namuturubi nirimagare babio, nimo nirimagare atu se keremati modobo ie mabu Godi nou nirimagare mabu dubu e. Nio abato etio ra urubia nirimagare na-imati-dumo neio Godi merebusere to ta-gararapoi-rimo ibose neio umoro ie Godi.

⁸ Etio ra urubia nirimagare imati tato, neio Godi umoro pua mabu Godi nou nirimagare mabu dubu e.

⁹ Nou simara ia mere gemeiriai-ro nedi duriomoro ro neito nimo keremiro gabo imodobura ri, nirimagare idaibo sosoro gowapotai-ro.

¹⁰ Morobise nirimagare tanaro ibo pua nimo ro Godi nirimagare beda sosoro nemati-dumo. Godi edi nirimagare na-iwawuti nimo aboto, io morobise nirimagare kimati ibo ie. Godi mere nou ri gemeiriai-ro araburai ri nou serawo adibiai ri miro edea rie, ibose nimo ubauba imatopeamuti ri.

¹¹ Nou nirimagare idaibo sosoro gowapotai-ro nimo aboto, namuturubi nirimagare babio nimo atu se nirimagare keremati modobo ie.

¹² Godi ata dubu ata ro owea pua. Kaupoti namabu nimo borubi kimibiria urubia mutu nirimagare keremati ato Godi nimo abato tateidiro-titi, ina nou edi nirimagare ro imese iamo nimo niro turi ato.

¹³ Godi ro Tarena Urio ta-gemeiriai-ro nimo aboto, nimo idaibo sosoro to noi-rimo umoro ibo nimo Godi abato ti-niateidiro-dumo, ibose Godi nimo abato tateidiro.

¹⁴ Abera nou simara ia mere nedi duriomoro ro neito ta-gemeiriai-ro imese sirio urubia ubauba aboudo iapopo rie. Nimo ro nou mere ta-nemowea-rimo, ina urubia sirio nimo ro neito nimowauti-dumo.

¹⁵ Etio ro paea se na-imowauti-dumo ibo, 'Iesu Godi mere ie,' Godi neio abato tomidiro, ibose neio Godi abato tiateidiro-dumo.

¹⁶ Godi ro nimo nirimagare na-nimatiti-ro nimo umoro ta-noi-rimo ina abora nimo Godi nirimagare ato norodoromaidiro-dumo.

Godi nou nirimagare mabu dubu e. Etio ra arua urubia nirimagare na-imatiti-dumo neio Godi abato iateidiro-dumo, ibose Godi neio abato tateidiro.

¹⁷ Ina idaibo sosoro tanaro kororosioidiro ato nimo nirimagare imese ama-iamotiti-ri nimo niro turi ato, nimo tere mutu orowotoi-ri pua Godi sosoro gabo ato nou ro koto to nama-iwou-ri. Nimo ro Godi tere emati-ri pua mabu Iesu idaibo sosoro na-imidirotiti Abera mutu, nimo abora idaibo sosoro norowomidiro nedi duriomoro ro nato.

¹⁸ Morobise nirimagare keremati ato tere iamo-ri pua nimo abato, mabu Godi edi nirimagare ro imese kiamo ato nimo abato edi tere ro nou ro kiwatatuti ie. Tere mabu ibo ie, ata dubu ubauba tanaro na-wosioidiro ina na-imaragoidiro ubauba wisa nou sapuwo to ama-owea-ri, iedi dubu ro nou tere koi ie, nimo umoro ie nirimagare auna se nou abato owamo pua.

¹⁹ Arua urubia nimo ro nirimagare nimati-dumo mabu Godi ro keba se edi nirimagare ro ta-gaiwai-ro nimo aboto.

²⁰ Nimo kimibiria borubi paea urubia ie, kaupoti Godi nimo ro kiauri pua. Kimibiria dubu ro nou kimibiria borubi nirimagare imati tato, nou ro modobo ia pua Godi nirimagare kemati.

²¹ Etio ro emati-dumo Godi nirimagare neio ro modobo ie borubi kimibiria urubia nirimagare kimati. Nedi owera ro Godi ro ibo nimowapotai-ro.

5

Iesu nou Godi mere ie modobo ie kimibiria

¹ Etio ro na-imibiria-dumo ibo Iesu nou Godi ro kohodowa dubu e, io neio Godi merebusere to ararasoro-dumo. Etio ro emati-dumo Abera Godi nirimagare, neio ro nou merebusere ibose to imati-dumo nirimagare.

² Godi nimo ro nirimagare na-nemati-dumo ina nou owera kibodoro ato, nimo umoro neito ti-norowaititi-dumo ibo nou merebusere nimo ro morobise nirimagare ti-nimati-dumo.

³ Godi ower a na-nibodoro-dumo nimo ro nou nirimagare nemati-dumo. Godi ower a koko pua kibodoro aboto,

⁴ mabu nou edi merebusere sirio ro neio aboudo modobo ie duriomoro tanaro sirio kiwororuwoidiro aboto. Nimo edi kimibiria tanaro ro duriomoro tanaro patu neito niwororuwoidiro-dumo.

⁵ Etio ro imibiria-dumo ibo Iesu nou Godi mere ie, io neio ro se iwororuwoidiro-dumo duriomoro tanaro patu, arua urubia ro modobo pua kiwororuwoidiro.

Godi ro simara mere sapuwo to gimowauti

⁶ Iesu Keriso na-gomidiro nedi duriomoro ro nato nou durupi Ioane ro obo to ta-gowarumia, io nou se pua, ina nou durupi rido karima ta-gosuputi pamo na-gowea.

⁷⁻⁸ Tarena Urio morobise ie, nou ro timowautititi ibo Iesu nou paea dubu to goroho. Tarena Urio nakara se pua Iesu na-owauti, ibose nedi tanaro teibo ro na-gororosioidiro-rido, nou durupi obo to Ioane ro na-gowarumia, ina nou durupi rido karima na-gosuputi, neibi ro Iesu atu se gowauti-birimo ibo nou paea dubu to goroho nato.

⁹ Urubia ro karo dorogora ower a, auna nakomu pua nimo ro kimibiria ie, kaupoti Godi ro karo ower a auna ia nakomu e, nimo ro modobo ie morobise to kimibiria, ina nou ia ro ta-nimowauti-ro nou simara mere sapuwo to.

¹⁰ Etio ro imibiria-dumo Godi edi mere ro nou sapuwo to, iedi morobise ower a ro Godi ro na-imowauti nou sapuwo to neio niro turi ato tiamo. Etio ra kimibiria tato Godi ro ower a

na-imowauti nou mere sapuwo to, io neio ro Godi karasaubuti dubu to asoro-dumo.

¹¹ Godi ro nimo keba se ta-nimowauti-ro ibo nimo ro womu tato womu tato keremiro nou aboudo ta-nowea-rimo, ina edi keremiro ro nou mere aboudo owamo-die.

¹² Godi mere etio abato omidiro nedi keremiro ro neio abato towamo. Ibose Godi edi Mere ro etio abato omidiro tato, iedi keremiro ro neio abato owamo pua.

Morobise umoro nimo abato tiamo

¹³ Godi edi mere ro nou sapuwo to nio na-imibiria-dumo mo ro nio aboto nisioidiro nedi owera sirio ro, nio umoro oi ri ibo womu tato keremiro nio abato towamo.

¹⁴ Godi aboto nimo tere tato nararatoro-dumo, nou ro nimo kararatoro owera ti-nimerewidiro-titi-die nou ubi tanaro maumo ato na-owamo.

¹⁵ Ina nimo umoro kiamo ato ibo nimo kararatoro owera Godi ro ti-nimerewidiro-titi-die, nimo umoro ie beda meamea ubi ato kararatoro ra nimo ro wisa kowea ie nou aboudo.

¹⁶ Nio ro na-owea-dumo ata kimibiria boinana ubauba na-wosioidiro, nio ro modobo ie nedi namutuna ro nou sapuwo to Godi kararatoro, ina nou ro nou womu tato keremiro komia ie. Arua ubauba tiamo urubia ro kisioidiro ato neio Godi ro imese kiasiai ie, korowameai gabo tato ie. Nedi namutuna ro nou ro idaibo ubauba na-wosioidiro nou sapuwo to mo ro imowapotai pua nio ro araratoro ri Abera.

¹⁷ Ata ubauba tanaro ata meana ato owamo pua, neio imese ubauba ia ie, kaupoti arua

ubauba kisioidiro ato nio Godi ro imese iasiai-ri pua.

¹⁸ Nimo umoro ie Godi merebusere ro ubauba inaina kisioidiro pua. Godi edi mere ro nou ro iwasioutititi, neio Satani ro modobo pua ubauba kiwaititi.

¹⁹ Nimo umoro ie nimo Godi merebusere ie. Kaupoti arua urubia nedi duriomoro gebari ro nato na-orowomidiro, neio Satani pupuwo maumo ato torowomidiro.

²⁰ Nimo umoro ie Godi edi mere ro ta-gou-ro, nou ro gabo ta-nimodobura-ro nimo ro morobise Godi umoro koi aboto. Ina nimo morobise Godi abato norowomidiro, ibose nou mere Iesu Keriso nou abato norowomidiro. Morobise Godi nou se ie, womu tato keremiro mabu dubu e.

²¹ Merebusere nirimagare babio, mea mino to ba-deremowotoi-mo, orora aboto orowaro mamu.

Tareka Buka
Portions of the Holy Bible in the Bamu language of
Western Province, Papua New Guinea
Buk Baibel long tokples Bamu long Niugini

copyright © 2023 SIL Papua New Guinea

Language: Bamu

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2026-08-26

PDF generated using Haiola and XeLaTeX on 26 Aug 2026 from source files dated 26 Aug 2026

14d82267-f09c-5d69-a15a-8b9a709122b4